


冊府元龜

二百十八之二十

六十六



漢書門類			
五三四五	又六	一	三〇〇
號	函	架	冊

内閣文庫			
五三四五	三〇〇	九	三
號	冊	架	函

内閣文庫	
番號	漢 5345
冊數	300 (66)
函號	365 6



冊府元龜

淺草文庫

淮南李嗣京參閱

西極文翔鳳訂正

豫章黃國琦較釋

閏位部 三十七

失政 疑忌 惡直

失政

夫布嘗無藝亂政亟行用茲為國何以永世自秦嬴
宰制事或非允吳蜀分據政則殊俗宋齊相襲梁陳
繼軌至於出令制命不厭於衆心阿諛近習匪率乎

焚則賞罰淆亂賢愚混同典禮無章用度靡紀而猶
驕心方熾白謂永圖逮於高齊咸有斯弊今取其梗
槩著之于編云

秦始皇二十六年丞相綰等言諸侯初破燕齊荆地
遠不為置王毋以填之填音竹 丹切請立諸子唯上幸許

始皇下其議於群臣群臣皆以為便廷尉李斯議曰
周文王所封子弟同姓甚衆然后屬疏遠相攻擊如
仇讐諸侯更相誅伐周天子弗能禁止今海內賴陛
下神靈一統皆為郡縣諸子功臣以公賦稅重賞賜
之甚足易制天下無異意則安寧之術也置諸侯不

便始皇曰天下共苦戰鬪不休以有侯王賴宗廟天
下初定又復立國是樹兵也而求其寧息豈不難哉

廷尉議是分天下為三十六郡三十六郡謂河南上

南郡九江鄣郡會稽潁川碭郡泗水一郡東郡琅邪

齊上谷漁陽右北平遼西遼東代郡會鹿郡鄆上黨

平原雲中太原鴈門上郡郡置守尉監秦郡守掌治

隴西北平中巴郡蜀郡更名民曰黔首黔亦黎三十四年

丞相李斯言古者天下散亂莫相一是以諸侯竝作
語皆道古以害今飾虛言以亂實人善其所私學以
非上所建立今皇帝竝有天下辨白黑而定一尊私
學相與非法教人制開令下卽各以其學議之入則



心非出則巷議非主以爲名異趨以爲高率群下以造謗如此不禁則主勢降乎上黨與成乎下禁之便臣請諸有文學詩書百家語者蠲除去之令到滿三十日弗去黥爲城旦所不去者醫藥卜筮種樹之書若有欲學者以吏爲師始皇可其議收去詩書百家之語以愚百姓使天下無以古非今

蜀後主卽位未踰月而改元者緣臣子心不忍一年而有二君也今可謂亟而不知禮矣又國不置史注記無官是以行事多遺災異靡書景曜元年宦人黃皓始專國政

吳大帝嘉禾中信任較事呂壹壹性苛慘用法深刻太子登數諫帝不納大臣繇是莫敢言

景帝永安中以丞相濮陽典及佐將軍張布有舊恩委之以事布典宮省典關軍國帝欲與祭酒常璩博士盛冲講論道藝曜冲素皆切直布恐入侍發其陰失因妄飾說以拒遏之帝初爲王時布爲左右將督素見信愛及至踐祚厚加寵待專擅國勢多行無禮自嫌瑕短懼曜冲言之故尤患忌帝雖解此一日心不能悅更恐其疑懼竟如布意廢其講業復使冲等

人

後主寶鼎中更營新宮制度弘廣飾以珠玉所費甚多是時盛夏興功農守竝廢天紀中岑昏險謏貴幸致位九列好興工役衆所患苦以上下離心莫爲后主盡力蓋積惡已極不復堪命故也

宋前廢帝卽位凶悖日甚誅殺相繼百司不保首領元凱以下皆被毆擣牽曳內外危懼殿省騷然

明帝好鬼神多忌諱言語文書有禍敗凶喪疑似之言應迴避者犯卽加戮以南苑借張永云且給參百年期盡更請阮佃夫楊運長王道隆皆擅威權言爲詔勅郡守令長一缺十除內外混然官以賄命王阮

家富於公家及秦始皇泰豫之際左右失言往往有剗削繼戮禁中慄慄若踐刀劍軍旅不息府藏空虛百官竝繼祿俸在朝皆市井傭販之子每所造制必爲正御三十副御三十須一物輒造九十枚天下騷然民不堪命

南齊鬱林王卽位極意賞賜動百數十萬每見錢曰昔時思汝一個不得今日將用汝末期年之間世祖齊庫儲錢數億番盡

東昏侯永元二年八月後宮遭火之後更起仙華神佛玉壽諸殿刻畫雕彩青葩金口帶麝香塗壁錦幔

珠簾窮極綺麗藝役工匠自夜達曉猶不副速乃剔取諸寺佛刹殿藻非仙人綺獸以充足之世祖與仙樓上施青漆世謂之青樓帝曰武帝不巧何不純用琉璃是歲十二月梁武起兵於襄陽三年正月丙申朔日有食之時加寅漏上八刻率宮人於闕武堂元會皇后正位闈人行儀帝戎服臨視自永元己後魏每來伐繼以內難揚州南徐州人丁三人取兩以此爲率遠郡悉令上米一人五十斛輸米既畢就役如故又東境苦役多注籍詐病或以積年皆攝充役又追責病者租布隨其年歲多少御命之人皆給貨賂

隨意縱捨又橫調徵求梁武兵至與御刀右左及六官於華光殿立軍壘以金土爲鎧仗親自臨陣詐被鎗勢以板榻將去以此馱勝又臺城外有伏兵乃燒城傍諸府署六門之內皆盡城中閣道西掖門內相聚爲市販歠牛馬肉猶惜金錢不肯賞賜茹法珍叩頭請之帝曰賊來獨取我耶何爲就我來求物後堂儲數百具榜啓爲城防帝云擬作殿境不與城防巧手悉令作殿晝夜不休

梁武帝末年委事群倖中領軍朱异之徒作福作威挾朋樹黨政以賄成服冕乘軒申其掌握是以朝綱

混亂賞罰無章小人道長抑此之謂也初侯景謀反合州刺史鄱陽王王範司州刺史羊鴉仁竝累有啓聞朱异以景孤立寄命必不應爾乃謂使者曰鄱陽王遂不許國家有一客竝抑而不奏故朝廷不爲之備及寇至城文武咸尤之异慙忿而卒高祖惜之方議贈事左右有善异者乃啓曰异忝歷雖多然平生所懷願得執法高祖因其宿志贈其侍中尚書右僕射

陳後主嗣位荒於酒色不恤刑政左右嬖俊珥貂者五十人婦人美貌麗服巧態以從者千餘人帝日酣飲從夕達旦以此爲嘗而盛修宮室無時休止稅江稅市徵取百端形罰酷濫牢獄嘗滿諸軍臨江後主曰王翳在此齊兵三來周兵再至無不摧沒今必自敗其臣孔範亦言無渡江理但奏妓縱酒作詩不輟北齊後主時韓鳳爲侍中領軍總知內省機密祖班曾與鳳於後主前論事班與鳳云強弓長矛無容相謝軍國謀筭何繇得爭鳳答云各出意豈在文武優劣封昌黎王息寶仁尚公主在晉陽賜第一區其公主生男滿月駕幸鳳宅宴會盡日每日一叅先被勅喚顧訪出後方引奏事官若不視事內省外頭急速

者附奏聞軍國要密無不經手東西巡及山水遊戲射獵多獨在御傍與高阿那肱穆提婆共處衡軸號日三費損國害政日日滋甚天統中毀東宮造修文偃武隆基嬪嬙院起玳瑁樓又於遊豫園穿池周以列館中起三山構臺以象滄海竝伏修佛寺勞役鉅萬計財用不給乃減朝士之祿斷諸曹糧膳及九州軍人嘗賜併之

是時有穆提婆母陸令萱後主乳保也提婆本姓賂父超以謀叛伏誅令萱沒入掖廷後主襁褓之中令其鞠養謂之乾阿奶遂大爲胡后所昵愛令萱奸巧

多機辨取媚百端宮掖之中獨擅威福後主紹位又優媚穆昭儀養之爲母是以提婆改姓穆氏及穆后立令萱號曰太姬此卽齊朝皇后毋氏之位號也視第一品班在長公主之上自武平之後令萱母子勢傾內外矣庸劣之徒皆重跡屏氣焉自外殺生子奪不可盡焉

疑忌

夫觀感而化道乃大明小信未孚民猶弗與况乎忌克爲量包藏在心片言或讐則寘之城府危機一發則酷於荼毒以此與物難以濟矣若夫晉文之誓白

水嫌吝以安世祖之推赤心反仄乃定是知至誠能化疑事無功以餘閩之小邦狹猜恐之凶德民之無援亡於何有雖苟無患不其隘哉

孫策既定江東時有高岱隱於餘姚策命出使會稽丞陸昭逆之策虛已而候焉聞其善左傳乃自玩讀欲學其論講或謂之曰高岱以將軍英武而已無文學之才若與論傳而或云不知者則其言符矣又謂岱曰孫將軍爲人惡勝已者若每問當言不知乃合意耳如皆辨義此必危殆岱以爲然及與論傳或答不知策果怒以爲輕已乃囚之知友及時人皆露坐

爲請策登樓望見數里中瑱滿策惡其收衆心遂殺之

大帝初以禮聘沈友友至論王霸之略當時之務帝歛容敬焉陳荊州宜併之計納之友正色立朝清議峻厲爲庸臣所譖誣以謀反帝亦以終不爲已用大帝大會官寮云友有所是非令人扶出謂曰人言卿欲反友知不得脫乃曰主上在許有無君之心者可謂非反乎遂殺之

後主使徐紹使魏行至濡須召還殺之徙其家屬建安始有白紹稱美中國者故也

張尚為侍郎以言語辯捷見知擢為侍中中書令後
 主使尚鼓琴尚對曰素不能勅使學之後宴言次說
 琴之精妙尚因道晉平公使師曠作清角曠言吾君
 德薄不足以聽之後主意謂尚以斯喻已不說後積
 他事下獄皆追以此為詰後主嘗問尚詩云汎波相
 舟惟相中舟乎尚對曰詩
言繪楫松舟則松亦中舟也又問鳥之大者惟鶴小
 者惟雀乎尚對曰大者有鸞鷲小者有鷓鴣鶴性忌
 勝已而尚談論每出其表積以致恨後問狐飲酒以
 方誰尚對曰陛下有百斛之量皓曰尚知孔丘之不
 玉而以孤方之因此發怒收尚尚書岑昏率
 公卿以下百餘人詣宮門頭請尚罪得減死送建安
 作船久之又就加誅

宋文帝時朱循之戍滑臺為後魏所陷大武寵之初

北人去來言循之勸誘大武侵邊並教大武以中國
 禮制文帝甚疑責之循之後得還具相申理帝意乃
 釋

孝武帝初與竟陵王誕同舉兵討元凶有奔牛之捷
 明年討南郡王義宣又有殊勳帝性多猜頗疑憚而
 誕造立第舍窮極巧工園池之美冠於一時多聚才
 力之士實之第內精甲利器莫非上品帝意愈不平
 建平二年乃出為使持節都尉督南徐兗二州諸軍
 事太子大傅南徐州刺史侍中如故帝以京口去都
 密邇猶疑之大明元年秋又出為都督南兗南徐兗

青冀幽六州諸軍事南兖州刺史

沈懷文孝武時爲侍中考武每宴集諸在坐者咸令沈醉懷文素不飲酒又不好戲調帝謂故欲異已謝莊嘗誠懷文曰卿每與人異亦何久懷文曰吾少來如此豈可一朝而變非欲異物性所得耳五年乃出爲晉安王子勛征虜長史廣陵太守

明帝初封湘東王虞愿爲國嘗侍帝立以藩國舊恩意過甚厚累遷通直散騎卽帝性猜忌體肥憎風夏月嘗着皮小衣拜左右二人爲司風令史風起方面轉先啓聞星文災變不信太史不聽外奏勅靈臺知

星二人給愿嘗直內省有異先啓以相簡察

吳喜爲驍騎將軍嘗對賓客言漢高魏武本是何人明帝聞之益不悅其後誅壽寂之喜內懼因啓乞中散大夫帝猶疑駭至是會帝有疾爲身後之慮以喜素得人情疑其將來不能事幼主乃賜歿

王景文爲中書監領揚州時明帝太子及諸皇子竝小帝稍爲身後之計諸將帥吳喜壽寂之徒竝殺之而景文外戚貴盛張永累經軍旅又疑其將來難信乃自謂謠言曰一士不可親弓長射殺人一士王字也弓長張字也及帝既有疾而諸弟竝已見殺唯桂

楊王休範人才本劣不見疑出為江州刺史慮一旦不諱皇后臨朝則景文自然成宰相門族強盛籍元舅之重歲暮不為純臣泰豫元年春帝疾篤乃遣使送藥賜景文手詔曰與卿周旋欲全卿門戶故有此處分歿時年六十

帝性猜疑多慮故亟行誅戮南幸簡于出入竟不南郊又云帝末年好鬼神多忌諱言語文書有禍敗凶喪及疑似之言應迴者數百千品有犯必加誅戮改騎馬邊爪亦以駟字近禍故也以南苑借張永云且給三百年期訖更啓其事類皆如此宣陽門民間謂之自門其名不諱甚諱之尚書右丞江謚嘗誤犯帝變色曰白汝家門謚稽顙謝之从方釋太后停屍漆床先出東宮帝嘗幸宮見之怒甚免中庶子宮職局以坐者數十人内外嘗慮犯觸人不自保宮内禁忌猶甚移床治壁必先祭土神使文士為文詞祝策如大祭饗

南齊鬱林王初為太孫武帝不豫詔竟陵王子良入侍醫藥日夜在殿内太孫間日入參承帝暴漸物議疑立子良俄傾而蘇問太孫所在遺詔子良輔政大孫少養於子良妃袁氏甚着慈愛既懼前不得立自此深忌子良大行出太極殿子良居中書省帝使虎賁中郎將潘敞領二百人屯伏太極西階之下成服後諸王皆出子良乞停至山陵不許

蒼梧王時豫章王嶷居清溪宅蒼梧夜中微行欲掩襲宅内嶷左右舞刀戟於中庭蒼梧從墻間窺見以為有備乃去

明帝建武中劉季連爲平西蕭遙欣長史南郡太守時帝諸子幼弱內親則仗遙欣兄弟外親倚后弟劉暄內弟江祐遙欣之鎭江陵也意寄甚隆而遇欣至州多招賓自封楨帝甚惡之季連族甥琅琊王會爲遙欣諮議叅軍美容貌頗事辨遙欣遇之甚厚會多傲忽於公座與遙欣競侮季連憾之乃密表帝稱遙欣有異跡帝納焉乃以遙欣爲雍州刺史帝心德季連以爲輔國將軍益州刺史令據遙欣上流陳顯達爲太尉侍中明帝欲悉除高武諸孫微言問顯達答曰此等豈足介慮帝乃止

梁武帝時劉顯爲國子博士有沙門訟田帝大署曰貞有司未辯遍問莫知顯曰貞字文爲與上人帝因忌其能出之後爲雲麾邵陵王長史潯陽太守魏使李諧至聞之恨不相識嘆曰梁德衰矣善人國之紀也而出之無乃不可乎

劉峻字孝標爲荊州刺史安成王戶曹叅軍初武帝每集文士策經史事時范雲沈約之徒皆引短推長帝乃悅加其賞賚會策錦被事言已罄帝試呼問峻峻時貧悴冗散忽請紙筆跪十餘事坐客皆驚帝不覺失色自是惡之不復見及峻薨苑成凡一百二十

卷帝即命諸學士撰華林遍略以高之竟不見用乃著辯命論以寄其懷

元帝初為湘東王時蕭賁為法曹叅軍得一府歡心及亂帝為檄賁讀至偃師南望魚復儲骨露寒河陽北臨或有穹廬擅帳乃曰聖製此句非為過似如體自朝廷非闕序賊帝聞之大怒收付獄遂以餓終又追戮賁尸乃著懷舊傳以謗之極言誣毀忠壯世子方等母徐妃以嫉妬失寵方等意不自安元帝聞之又忌方等益懼故書論以申其志焉

論具儲官文學

王琳為衡州刺史時元帝性多忌以琳所部甚眾又

得衆心故出之嶺外又授都督廣州刺史其友人王書李膺帝所任遇琳告之曰琳蒙拔擢當欲畢命以報國恩今天下未平遷琳嶺外如有萬一不虞安得球力村官正疑琳耳琳分望有限可得與官爭為帝乎何不以琳為雍州刺史使鎮武寧琳自放兵作田為國禦捍若驚悉動靜相知孰若遠棄嶺南相去萬里一日有變將欲如何琳非願長坐荆南正以國計如此耳膺然其言而不敢啓遂率其衆鎮嶺南陸法和為都督郢州刺史法和善為攻戰具在江夏大聚兵艦欲襲襄陽而入武關元帝使止之法和曰

空王佛所與主上有香火因緣見主上應有報至故
救援耳今既被疑是業定不可改也

樂良王大圍簡文子也元帝初徙封晉熙王瑯邪鼓
城二郡太守帝既有克復之功而大圍允汝南王大
封猶未通謁帝性忌刻甚恨望之乃謂大圍曰汝兩
允久不出汝可以意召之大圍即日曉諭兩允相繼
出謁帝乃安

陳高祖以杜稜監義興瑯邪二郡帝誅王僧辯引稜
與侯景都等共議稜難之帝懼其泄已乃以手巾絞
稜悶絕于地因閉于別室軍發召與同行

後主既卽位鄱陽王伯山長子君範爲貞威將軍晉
陵太守隋師至是時宗室王侯在者百餘人後主恐
其爲變乃竝召入令屯朝堂使豫章王叔英總督之
而又陰爲之備及六軍敗績相率出降

樊猛爲忠武將軍南豫州刺史隋將韓擒虎濟江猛
在京師第六子巡攝行事擒虎進軍攻陷之巡及家
口竝見執時猛與左衛將軍蔣元遜領青龍八十艘
爲水軍於白下遊奕以禦隋六合兵後主知猛妻子
在隋軍懼其有異志欲使任忠代之又重傷其意乃

止

北齊後主時蘭陵王長恭爲荊州刺史芒山之戰長恭爲中軍率五百騎再入周師後主謂長恭曰入陣大深失利悔無所及對曰家事親切不覺遂然帝憐其稱家事遂忌之後帝使飲以毒藥薨

斛律光爲右丞相率步騎五萬克復秦姚襄白亭城戍又取周建安等四戍而還軍未至鄴勅令便放兵散光以爲軍人多有勲功未得慰勞若即便散恩澤不施乃密通表請使宣旨軍仍且進朝廷發使遲留軍還將至紫陌光仍駐營待使後主聞光軍營已逼

心甚惡之恐令舍人追光入見然後宣勞散兵拜光右丞相又別封清河郡公

北平王貞武成第五子也位司州牧京畿大都督兼尚書令錄尚書事武成行幸總留臺事種年後主以貞長大漸忌之阿那肱承旨令馮士幹劾繫貞于獄奪其留後權

梁太祖時劉知俊威望益隆帝猜日甚會佑國軍節度使王重師無罪見誅知俊居不自安乃據同州叛送款於李茂貞又分兵以襲雍華雍州節度使劉捍被擒送鳳翔害之華州蔡敬思被傷獲免帝聞知

俊叛遣近臣諭之曰朕待卿甚厚何相負耶知俊報曰臣非背德但畏死耳王重師不負陛下而致族滅帝復遣使謂知俊曰朕科卿爲此昨重師得罪蓋劉捍言陰結邠鳳終不爲國家用我今雖知在濫悔不可追致卿如斯我心恨恨蓋劉捍悞予事也捍死固未塞責知俊不報遂分兵以守潼關帝命劉鄩率兵進討攻潼關下之時知俊弟知流爲親衛指揮使聞知俊叛自雒奔至潼關爲鄩所擒害之尋而王師繼至知俊乃舉族奔於鳳翔庶人友珪以敬翔天下之望命翔爲宰相友貫請宣

學士兼召諫臣言陰陽序理之端人事調和之本又嚴修祀典精事神祇宜令有司依奏處繫所云進忠良而退不肖除寇盜而恤孀嫠雖責在朕躬亦資于調燮刑法舒條宜令大理寺御史臺明慎詳讞勿至寃誣選賢退愚宜令三銓選部精覈慎選所與得人新舊制勅令御史臺與三司官員詳擇以聞周馮道初仕後唐明帝時平章事長興初帝御中興殿對道奏曰陛下宮中無事遊幸近郊則可矣然則御馬涉歷山險萬一馬足差跌則貽臣下之憂臣聞千金之子坐不垂堂百金之子立不倚嚮彼千金百

金之微細尚猶惜其身保其產而况富有四海貴為天子自輕於彼千金百金之子哉愿陛下居安慮危動存戒慎上歛容謝之退令小黄門至中書勅道錄奏所對番堂語道因注其說以聞四年帝對宰臣曰諸州鎮數上言有螟蝗民力尚貧將來何以得濟道奏曰天灾流行古今嘗所不免自陛下臨御八年七年豐稔今操父子逼主篡位故乃羈旅萬里糾合士衆將以討賊今大敵未克而先自立恐人心疑惑昔高祖與楚約先破秦者王及屠咸陽獲子纓猶懷推讓况今殿下未出門庭便欲自立邪愚臣恐不為殿

下取也繇是忤旨左遷部丞昌從事

惡直

關文

吳大帝初為吳侯辟陸績為曹掾以直道見憚出為鬱林太守虞翻為騎都尉翻數犯顏諫爭大帝不能悅又性不協俗多見謗毀坐徙丹陽涇縣翻性疏直數有酒失大帝與張昭論及神仙翻指昭曰彼皆灰人而語神仙世豈有神仙也大帝積怒非一遂徙翻交州

屈晃為尚書僕射大帝欲廢太子和立亮晃固諫不

止大帝大怒牽晃入殿杖一百

後主時王蕃爲散騎嘗侍體氣高亮不能承顏順旨時或逆意積以見責甘露二年後主大會群臣蕃沉醉頓伏後主大怒呼左右于殿下斬之衛將軍滕牧征西將軍留平請不能得

樓玄以大農爲宮下鎮禁中候主殿中事玄從九卿持刀侍衛正身率下奉法而行應對切直數逆後主意漸見責怒後人誣白玄與賀邵相逢駐共耳語大笑謗訕政事遂被詔責送付廣州後主疾玄名聲復徙玄及子據付交趾將張奕使以戰自効陰別勅奕

令殺之

賀邵爲中書令領太子大傅後主克暴驕矜政事日弊邵上疏切諫書奏後主深恨之後竟見殺

常曜爲侍中嘗領左國史時在所承旨數言瑞應後主以問曜曜答曰此人家箱篋中物耳又後主欲爲父和作紀曜執以和不登帝位宜名爲傳如是者非一漸見責怒後主於酒後使侍臣難折公卿以嘲弄侵克發摘私短以爲歡時有愆過或誤犯後主諱輒見收縛至於誅戮曜以爲外相毀傷內長尤恨使不濟濟非佳事也故但使難問經義言論而已後主以

為不承用詔命意不忠盡遂積前後嫌忿收驩付獄
誅之徙其家零陵

華覈為東觀令領右國史上疏諫後主後主不納後
以微譴免數年而卒

宋文帝時符全育為龍驤將軍元嘉中彭城王義康
出鎮豫章全育上表諫曰陛下若蕩以平聽屏此猜
情速召義康返于京甸兄弟協和則四海之望塞讒
說之道消矣表奏即收付建康獄賜歿

孝武帝時沈懷文為侍中懷文與顏峻周朗素善峻
以失旨見誅朗亦忤意得罪帝謂懷文曰峻若知我

殺之亦當不敢如此懷文嘿然嘗以歲夕與謝莊王

景文顏師伯被勅入省未及進景文因言次稱峻朗
人才之美懷文與相調和師伯後因語次白帝叙景
文等此言懷文屢經犯忤至此帝倍不悅

蔡興宗為侍中時孝武拜陵興宗負璽陪乘及還帝
欲因以射雉興宗正色曰今致虔園陵情敬兼重從
禽從猶有餘日請待他辰帝大怒遣令下車繇是失
旨

廢帝時王玄謨為領軍將軍朝政多門玄謨以嚴直
不容徒青冀二州刺史

明帝時虞愿為通直散騎侍郎初帝以宅起湘宮寺立佛刹各五層新安太守巢尚之罷郡還見帝曰卿至湘宮寺來我起此寺是大功德愿在側曰陛下起此寺皆是百姓賣兒貶婦錢有何功德帝大怒使人驅下殿

梁高祖時江子四為右丞左民郎沈禮明少府丞顧璵奏事不允高祖厲色呵責之子四乃趨前代禮明等對言甚激切高祖怒呼縛之子四據地不受高祖怒亦始乃釋之猶坐免職

陳後主時毛喜為侍中後主為始與王所傷及瘡愈

而自慶置酒于後殿引江總以下展樂賦詩辭而命喜于時山陵初畢未及踰年喜見之不懌欲諫而後主已醉升階陽為心疾仆于階下移出省中後主醒而疑之謂江總曰我悔召毛喜知其無疾但欲阻我歡宴非我所為故姦詐耳乃與司馬申謀曰此人負氣吾欲將乞鄱陽兄弟聽其報讐可乎對曰終不為宮用願如聖旨傳繹爭之曰不然若許報讐欲置先皇何地後主曰當乞一小州勿令見人事乃除永嘉內史

蔡凝為黃門侍郎後主嘗置酒會群臣歡甚將移醺



於弘範宮衆人咸從唯凝與表憲不行後主曰卿何爲者凝對曰長樂尊嚴非酒後所過臣不敢奉詔衆部諸人失色後主曰卿醉矣令引出後主謂吏部尚書蔡徵曰蔡凝負地矜才無所用也尋遷晉熙長史章華爲大市令禎明初上書極諫後主大怒卽日命斬之

北齊文宣帝時高德政爲尚書右僕射兼侍中文宣末年縱酒酣醉所爲不法德政屢進忠言帝不悅李集爲御史丞文宣肆行淫暴凡所殺害多令支解集面諫帝比於桀紂帝令縛置漳流中沈沒久之後

遂腰斬

李雅廉爲大原郡守文宣嘗召見問以治方語及政行寬猛帝意深文峻法雅廉固以爲非帝意不悅語及楊愔愔稱爲楊公以應對失宜除濟陰郡守帶西兗州長史

孝昭帝初爲嘗山王文宣昏亂日甚帝承間嘗諫遂至忤旨文宣使力士按伏白刃注頸罵曰小子何知欲以吏才非我是誰教汝帝曰天下噤口除臣誰敢有言文宣催遣播楚亂杖扶數十命醉卧得解崔劼爲五兵尚書武成將禪後主先以問劼劼諫以

議失於長世之御亂華之暴乘間而作故劉淵以五部之衆起於離石石勒因晉陽之甲據乎襄國厲階之構乃繇於此而李特以流徙之隸奄宅益部而爲蜀慕容廆因封建之舊保界遼碣而爲燕羣雄競起宇內分裂河西之區張軌攸領因而稱制是稱前涼自此晉綱絕紐中原震蕩龜玉南徙遂荒江介其後符洪自冀州之廣川建三晉之號入寇關輔居長安而爲秦李暠跨敦煌之地雄西夏而稱西涼慕容垂守中山之國蹈兩河而爲後燕乞伏國仁憑河湟之輿而爲西秦呂光按酒泉之富而爲後涼姚萇乘符

氏之業而爲後秦馮跋踐昌黎之域而爲北燕禿髮烏孤負西平之阻而號南涼慕容德依廣固之險而爲南燕沮渠蒙遜保張掖而爲北涼赫連勃勃連朔方而稱夏凡十有六國焉俱僭大號各建正朔或稱王爵並專誅賞傳世垂祚歷歲彌久而率多戎虜之種或出氐羗之類始愆制馭終以疆大分宰諸夏專制民命吞并相繼兵難不絕家國殊政百有餘年洎宋祖之奮威及元魏之雄視芟夷掃蕩剪焉靡餘以至唐室之季王度交喪禮樂征伐不出於朝廷山河疆理遂分於土壤王審知跨據山海裂五郡而爲閩

王建憑恃巖險包三川而為蜀楊行密宅淮海之壤
擅魚鹽之富建號而稱吳劉陟揔百越之衆通珠貝
之利開國而為漢其後孟知祥因同光之難憑二劍
之固僭尊名而為後蜀李昇承吳人之業保重江之
阻冒舊服而為唐劉崇以漢室之亡托於宗胃仍厥
位號保於太原而吳唐二蜀繼守其宇七閩之亂厥
土三分顯德之世尚餘四國皇朝受命始平井絡旋
殄五嶺後克江表三晉遺孽再駕而服混一區內以
致太平今自西晉之後洎唐宋諸國論次其事類以
為僭偽部凡三十七門

姓系 年號

姓系

夫胙土命氏事存於魯史別生分類義載於虞書蓋
所以辨族類而定嫌疑厚人倫而正宗祀也若夫傑
點之流乘時射利割據州壤負阻山河或保聚方隅
或饕竊大號雖遊魂假息寧亂紀於帝國然瓜割豆
分咸編名於惇史源流所自祚裔攸存廣記備言既
可徵於舊史洽聞殫見將有助於方來爰用討論咸
從編次

前凉張軌字士彥安定烏氏人漢嘗山景王耳十七



世孫也家世孝廉以儒學顯父溫爲太官令軌晉惠
帝時爲散騎嘗侍征西軍司馬永寧初出爲護羌較
尉涼州刺史愍帝時進位司空固讓又拜侍中大尉
涼州牧西平公軌又固辭在州十三年表立子寔爲
世子卒年六十謚曰武公州人推寔攝父位寔字安
孫愍帝因下策書授持節都督涼州諸軍事西中郎
將涼州刺史領護羌較尉西平公在位六年爲帳下
閹汝所害私謚曰昭公元帝賜謚曰元子駿年幼弟
茂攝事州人推茂爲大都督大尉涼州牧茂不從但
授使持節平西將軍涼州牧在位五年卒私謚曰威

茂無子寔子駿嗣位駿字公庭在位二十二年卒私
謚曰文公穆帝追謚曰忠成公第二子重華嗣位自
稱持節大都督太尉護羌較尉涼州牧西平公假涼
王重華字泰臨在位十一年卒私謚曰昭公後改曰
桓公穆帝賜謚曰敬烈子耀靈年十歲嗣事稱大司
馬較尉刺史西平公在位一年爲伯父祚所害私謚
曰哀公祚字太伯自稱大都督大將軍涼州牧永和
十年祚僭稱帝位篡立三年爲其下張濤等所殺立
耀靈庶弟玄靚爲大都督大將軍較尉涼州牧西平
公玄靚字元安在位九年爲駿少子天錫所害私謚

曰冲公孝武帝賜謚曰敬悼公天錫自號大將軍較尉凉州牧西平公在位十三年隆于符堅

自軌為凉州至天錫

凡九世七十六年

西凉李暠字玄盛小字長生隴西成紀人漢前將軍廣之十六世孫也廣會祖仲翔漢初為將軍討叛氐於素昌素昌即狄道也衆寡不敵死之仲翔子伯考奔喪因葬於狄道之東川遂家焉世為西州右姓高祖雍會祖柔仕晉並歷位郡守祖弁仕張軌為武衛將軍家世亭侯父景幼有令名早卒遺腹生暠呂光未及業所署沙州刺史孟敏署焉敏穀令敏率護軍

郭謙治中索僊等推玄盛為敦煌太守稱藩於業晉安帝隆安四年晉昌太守唐瑤推玄盛為大都督將軍凉公領秦凉二州牧護羌較尉在位十八年年六十四私謚曰武昭王子歆嗣歆字士業小字桐惟在位四年為沮渠蒙遜所滅弟敦煌太守恂為郡人宋承等所推為凉州刺史二年又為蒙遜所滅

始暠以安帝隆

安四年僭位凡三世二十四年

前趙劉淵字元海新興匈奴人冒頓之後也初漢高祖以宗女為公主以妻冒頓約為兄弟故其子孫遂冒姓劉氏後漢建武初烏珠留若鞮單于子右奧鞮

日逐王比自立為南單于入居西河美稷今離石左
 國城郎單于所徙庭也中平中單于羗渠使子於扶
 羅將兵助漢討平黃巾會羗渠為國人所殺於扶羅
 以其衆留漢自尊為單于屬董卓之亂寇掠大原河
 東屯於河內於扶羅死弟呼厨泉立以於扶羅子豹
 為左賢王即元海之父也魏武分其衆為五部以豹
 為左部帥其餘部師皆以劉氏為之大康中改置都
 尉左部居大原茲氏右部居祁南部居蒲子北部居
 新興中部居大陵劉氏雖分居五部然皆家于晉陽
 汾澗之濱豹生元海晉惠帝時為成都王穎所拜北

單于永興元年僭稱漢王永嘉二年僭即皇帝位在
 位六年偽謚光文皇帝太子和立和字玄泰嗣偽位
 為弟聰所害聰字玄明一名載元海第四子以永嘉
 四年僭即皇帝位在位九年偽謚曰昭武皇帝子粲
 嗣偽位粲字士光在位一年為靳準所殺元海族子
 曜自長安赴難至於赤壁偽太保呼延宴等迎立之
 以大興元年僭即皇帝位曜字永明在位十年為石
 勒所殺元海自懷帝永興元年僭位
 至曜三世凡二十有七年
 後趙石勒字世龍初名匄上黨武鄉羯人也其匈奴
 別部羗渠之胄祖邪奕於父周末一名乞翼加並為

部落小率勒仕劉元海為平東大將軍封親漢王晉
 元帝大興二年偽稱趙王成帝咸和五年僭號趙天
 王行皇帝事尋僭即皇帝位在位十五年年六十子
 弘嗣偽位弘字大雅在位二年年二十二為勒從子
 虎所廢尋殺之虎字季龍稱居攝趙天王咸康三年
 僭稱大趙天王穆帝永和五年僭即皇帝位六年季
 龍死在位十五年子世立凡三十日為兄遵所廢
 遵立一百八十三日為冉閔所殺立石鑒鑒在位一
 百三日為閔所殺始勒以成帝咸和三年僭
 立二主四子凡二十三年閔字永
 魯小字棘奴季龍之養孫也父瞻字弘武本姓冉名

良魏郡內黃人也其先漢黎陽騎都督累世牙門勒
 破陳午獲瞻時年十二命季龍之子驍猛多力攻戰
 無前歷位左積射將軍西華侯閔幼而果銳季龍撫
 之如孫永和六年殺石鑒自立僭位二年為慕容雋
 所滅

前燕慕容廆字奕維瓌昌黎棘城鮮卑人也其先有
 熊氏之苗裔世居北夷邑於紫蒙之野號曰東胡其
 後與匈奴並盛控弦之士二十餘萬風俗官號與匈
 奴畧同秦漢之際為匈奴所敗分保鮮卑山因以為
 號魯祖莫護跋魏初率其諸部入居遼西從宣帝伐

公孫氏有功拜率義王始建國於棘城之北時燕代多冠步搖冠莫護跋見而好之乃歛髮襲冠諸部因呼之為步搖及後音訛遂為慕容或云慕二儀之德繼三光之容遂以慕容為氏祖木延左賢王父涉歸以全柳城之功進拜鮮卑單于遷邑於遼東北於是漸慕諸夏之風矣庖晉武帝太康中為鮮卑都督累轉遼東公持節都督幽州諸軍事車騎將軍平州牧大單于在位四十九年年六十五成帝遣使者策贈大將軍開府儀同三司謚曰襄第三子皝嗣位皝字元真帝遣謁者拜鎮軍大將軍平州刺史大單于遼

東公咸康三年僭即天王位在位十五年年五十二第二子雋立雋字宣英穆帝永和五年僭即燕王位八年僭即皇帝位在位十一年年四十二子暉嗣偽位暉字景茂在位一十一年為符堅所滅始鹿以武帝太康六年

年稱公至暉四世凡八十五年

前秦符洪字廣世畧陽臨渭氏人也其先蓋有扈之苗裔為西戎酋長始其家池中蒲生長五丈五節如竹形時咸謂之蒲家因以為氏焉父懷歸部落小帥洪仕石季龍累有戰功封西平郡公穆帝永和六年季龍死洪口稱大將軍大單于三秦王改姓符氏是

年洪死年六十六子健嗣位去秦王之號七年僭稱天王大單于八年僭即皇帝位健字建業在位四年年三十九子生嗣偽位生字長生在位二年年二十三為符堅所殺堅字永固一名文王洪季子雄之子也以升平元年僭稱大秦天王在位二十七年年四十八孝武太元十年為姚萇所滅堅庶長子丕僭即皇帝位於晉陽丕字永叙在位二年為慕容永所敗堅族孫登以太元十一年僭即皇帝位登字文高在位九年年五十二為姚興所滅

始建以穆帝永和七年僭立至登五世此

四十四年

後秦姚弋仲南安赤亭羌人也其先有虞氏之苗裔禹封舜少子於西戎世為羌酋其後燒當雄於洮罕之間七世孫填虞漢中元末寇擾西州為楊虛侯馬武所敗徙出塞虞九世孫遷郗率種人內附漢朝嘉之假冠軍將軍西羌較尉歸順王處之於南安之赤亭那玄孫柯迴為魏鎮西將軍綏戎較尉西羌都督迴生弋仲仕石季龍為征西大將軍封西平郡公晉穆帝永和七年遣使降晉拜六夷大都督大單于封高陵郡公八年弋仲卒子襄嗣襄字景國升平元年為符堅所殺弟萇降堅萇字景茂堅以為楊武將軍

累遷龍驤將軍孝武大元九年自稱大將軍大單于
 萬年秦王以大元十一年僭即皇帝位在位八年年
 六十四長子興嗣自稱大將軍明年僭即皇帝位興
 字子畧在位二十二年年五十一長子泓嗣以義興
 十一年僭即皇帝位泓字元子在位二十年年三十
 為晉所滅始萇以孝武大元九年僭
立至萇三世凡三十三年
 後蜀李特字玄休巴西宕渠人其先廩君之苗裔也
 昔武落鍾離山崩有石穴二所其一赤如丹一黑如
 漆有人出於赤穴者名曰務相姓巴氏有出於黑穴
 者凡四姓曰暉氏樊氏栢氏鄭氏五姓俱出皆爭為

神於是相與以劔刺穴屋能著者以為廩君四姓莫
 著而務相之劔懸焉又以土為船彫畫之而浮水中
 曰若有船浮存者以為廩君務相船又獨浮於是遂
 稱廩君乘其土船將其徒卒當夷水而下至於監陽
 水神女子止廩君曰此魚鹽所有地又廣大與君俱
 生可止無行廩君曰我當為君求廩地不能止也鹽
 神夜從廩君宿旦輒去飛虫諸神皆從其飛蔽日晝
 昏廩君欲殺之不可別又不知天地東西如此者十
 日廩君乃以青縷遺鹽神曰嬰此即宜之與汝俱生
 弗宜將去汝鹽神受而嬰之廩君立碭石之上望膺

有青縷者跪而射之中監神監神死羣神與俱飛者皆去天乃開朗廩君復乘土船下及夷城夷城石岸曲泉水亦曲廩君望如穴狀嘆曰我新從穴中出今又入此柰何岸即為摧廣三丈餘而階陛相乘廩君登之岸上有平石方一丈長五尺廩君休其上投策計筭皆著石焉因立城其旁而居之其後種類遂繁秦并天下以為黔中郡簿賦役之口歲出錢四十巴人呼賦為寶因為寶人焉特父纂為東兗獵將特晉武帝元康中隨流人至蜀其後流人特為主行鎮北大將軍惠帝大安元年自稱益州牧都督梁益二州

諸軍事在位二年為晉益州刺史羅尚所殺特弟流自稱大將軍大都督益州牧流字玄通年五十六死特子雄自稱大都督大將軍益州牧永興元年僭稱成都王又僭即帝位雄字仲雋在位三十年年六十一兄蕩之子班嗣偽位班字世文為李越所殺在位一年年四十七遂立雄之子期字世運在位三年年二十五為李壽所廢自縊死壽字武考特弟驥之子在位五年年四十四長子勢嗣偽位勢字子仁在位五年為晉所滅始特以惠帝大安元年起兵至勢六世凡四十六年後涼呂光字世明畧陽氏人也其先呂文和漢文帝

初自沛避難徙焉世為酋豪父婆樓佐命符堅官至
 太尉光仕符堅為都督五門巴西諸軍事安西將軍
 西域較尉堅為姚萇所害光於是自稱使持節侍中
 中外大都督督隴右河西諸軍事大將軍領護匈奴
 中郎將凉州牧酒泉公晉孝武大元十四年僭即三
 河王位二十一年僭即天王位在位十年年六十嫡
 子紹嗣偽位為庶長子纂所殺纂字永緒僭即天王
 位在位三年為呂起所殺立光弟寶之子隆嗣偽位
 隆字永基為姚興所滅始光以孝武大元十三年定凉州十五年僭立至隆凡十
 載有三

後燕慕容垂字道明前燕慕容皝之第五子慕容皝
 時封為吳王慕容暉為符堅所滅垂在堅朝歷位京
 兆尹堅敗垂引兵至滎陽以晉孝武大元八年自稱
 大將軍大都督燕王在位十三年年七十一子寶嗣
 寶字道祐在位三年年四十四子盛嗣盛字道運在
 位三年年二十九垂少子熙嗣熙字道文在位六年
 年二十三為寶養子雲所弒雲字子雨祖父高和居
 驪之支庶自云高陽氏之苗裔故以為高氏焉始垂以孝
武大元八年僭立至熙四世凡二十四年雲尋為幸臣離班姚仁所殺
 西秦乞伏國仁隴西鮮卑人也在昔有如弗斯出連

叱盧三部自漢北南出大陰山遇一巨蟲於路其狀若神龜大如陵阜乃殺馬而祭之祝曰若善神也便開路惡神也遂塞不通俄而不見乃有一小兒在焉時又有乞伏部有老父無子者請養爲子衆咸許之老父欣然自以有所依憑字之曰紇干紇干者夏言依倚也年十歲驍勇善射彎弓五百斤四部服其雄武推爲統主號之曰乞伏可汗託鐸莫何託鐸者言非神非人之稱也其後有祐鄰者卽國仁五世祖也晉武帝泰始初率戶五千遷於夏綠部衆稍盛鮮卑鹿結七萬餘落屯於高平川與祐鄰迭相攻擊鹿結

敗南奔畧陽祐隣盡并其衆因居高平川祐隣死子結權立徙於牽屯結權死子利郝立擊鮮卑吐賴於烏樹山討尉遲渴權於大非川收衆三萬餘落利郝死弟祁溼立祁溼死利郝子述延立討鮮卑莫侯於苑川大破之降其衆二萬餘落因居苑川以叔父軻溼爲師傅委以國政斯引烏溼爲左輔將軍鎮蔡園川出連高胡爲右輔將軍鎮至便川叱盧郝胡爲率義將軍鎮牽屯山述延死子儁大寒立會否勒滅劉曜懼而遷於麥田無孤山大寒死子司繁立始遷於度堅山尋爲符堅將王統所襲部衆叛降於統司繁

歎謂左右曰智不距敵德不撫衆劔騎未交而本根已敗見衆分散勢亦難全若奔諸部必不我容吾將爲呼韓邪之計矣乃詣統降於堅堅悅署爲南單于留之長安以司繁叔父吐雷爲勇士護軍撫其部衆俄而鮮卑勃寒侵斥隴右堅以司繁爲使持節都督討西胡諸軍事鎮西將軍以討之勃寒懼而請降司繁遂鎮勇士川甚有威惠司繁卒國仁代鎮孝武大元十年自稱大都督大將軍大單于領秦河二州牧在位四年弟乾歸嗣乾歸在位二十四年子熾磐嗣熾磐在位十五年子慕末嗣慕末在位四年爲赫連

言所殺

始國仁以孝武大元十年僭位至慕末凡四世四十有六載而滅

北燕馮跋字文起長樂信都人也小字乞直伐其先畢萬之後也萬之子孫有食菜馮卿者因以氏焉永嘉之亂跋祖父和避地上黨父安雄武有器量慕容永時爲將軍永滅跋東徙和龍家於長谷跋爲慕容雲所署使持節侍中都督中外諸軍事雲爲其幸臣所殺跋乃僭稱天王於昌黎在位二十二年弟弘立九年爲後魏所滅始跋以安帝義熙五年僭立至弘凡二世二十八年南涼秃髮烏孤西河鮮卑人也其先與後魏同出八世祖匹孤率其部自塞北遷於河西其地東至麥田

率屯西至濕羅南至澆河北接大漠匹孤卒子壽闐
 立初壽闐之在朶母胡掖氏因寢而產於被中鮮卑
 謂被為禿髮因而氏焉壽闐卒孫樹機能立壯果多
 謀畧晉武帝泰始中殺秦州刺史胡烈於萬斛堆殺
 涼州刺史蘓愉於金山盡有涼州之地武帝為之肝
 食後為馬隆所敗部下殺之以隆弟務丸立死孫堆
 斤立死子思復鞬立部眾稍盛烏孤即思復鞬之子
 也安帝隆安元年自稱大都督大將軍大單于西平
 王在位三年弟利鹿孤立徙居西平利鹿孤在位三
 年弟儁擅嗣儁擅僭號涼王遷於樂都在位十三年

年五十一為乞伏熾磐所滅

始烏孤以安帝隆安元年僭立凡三世十有九年

南燕慕容德字玄明後燕慕容垂之弟垂稱燕王以
 德為車騎大將軍垂死子寶嗣寶以德為丞相領冀
 州牧承制南夏晉安帝隆安四年僭即皇帝位在位
 五年年七十兄子超嗣超字祖明在位六年為晉所
 滅始德以安帝隆安四年僭立至超二世凡十一年
 北涼沮渠蒙遜臨松盧水胡人也其先世為匈奴左
 沮渠遂以官為氏焉蒙遜仕段業為張掖太守晉安
 帝隆安五年梁中庸等推為使持節大都督大將軍

涼州牧義熙八年僭立在偽位三十三年年六十六
子茂慶立六年為後魏所擒

凡二世三十九載

夏赫連勃勃字屈于句奴右賢王去卑之後劉元海
之族也魯祖武劉聰世以宗室封樓煩公拜安北將
軍監鮮卑諸軍事丁零中郎將雄據肆盧川為代王
倚盧所敗遂出塞表祖豹子招集種落復為諸部之
雄石季龍遣使訖拜平北將軍左賢王丁零單于父
衛辰入居塞內苻堅以為西單于督攝河西諸虜屯
於代來城及堅國亂遂有朔方之地控弦之士三萬
八千後魏師伐之辰令其子力侯提距戰為魏所敗

魏人乘勝濟河尅代來執辰殺之勃勃乃奔於叱干
部晉安帝義熙三年僭稱天王大單于自以匈奴夏
后氏之苗裔也國稱大夏又下書曰朕之皇祖自北
遷幽朔姓改妣氏音殊中國故從母氏為劉子而從
母之姓非禮也古人氏族無嘗或以因生為氏或以
王父之名朕將以義易之帝王者係天為子是為微
赫實與天連今改姓曰赫連氏庶協皇天之意永享
無疆之慶係天之尊不可令支庶同之其非正統皆
以鐵代為氏庶朕宗族子孫剛銳如鐵皆堪伐人勃
勃在位十三年子昌嗣偽位尋為後魏所擒弟定僭



號於平涼遂為魏所滅

自勃勃至定凡二十有六載

閩王審知字信通光州固始人父恁世為農民唐僖宗廣明中黃巢犯闕江淮盜賊蜂起有賊帥王緒者自稱將軍陷固始縣審知兄潮時為縣佐緒署為軍正蔡賊秦宗權以緒為光州刺史尋遣兵攻緒緒率眾渡江所在剽畧自南康轉至閩中入臨汀自稱刺史緒多疑忌為部將所殺唐僖宗光啓二年福建觀察使陳巖表潮為泉州刺史昭宗大順中巖卒子瑁范暉自稱留後潮遣審知將兵攻之斬暉而降繇是盡有閩嶺五州之地潮即表其事昭宗因建威武軍

於福州以潮為節度福建管内觀察使命審知為副

乾寧中潮卒審知遂繼兄位封琅邪郡王梁開平中

封閩王後唐同光元年審知卒子延翰嗣為弟延均

所殺延均自稱帝國號大閩末帝清泰二年遇弒子

昶嗣昶遇弒審知少子延羲嗣延羲遇弒兄延政自

稱帝於建州晉開運三年為李景所滅始王氏以唐光啓丙午歲

據有閩越凡二世七王通六十年

前蜀王建字光圖陳州項城人也父慶里之豪右唐僖宗光啓元年入蜀州為壁州刺史率兵攻陷閩利二州又攻陷成都昭宗隆紀元年授西川節度副大

使知節度事梁太祖開平二年建自帝於成都國稱
 大蜀在位十二年年七十二子衍嗣衍字化源在位
 七年年二十五為後唐所滅建自唐光啓初入蜀父子相承凡四十年
 吳楊行密廬州人唐僖宗光啓初秦宗權擾淮右郡
 將募能致戰擒賊者行密應募補為隊長因殺郡將
 自權州兵朝廷因正授廬州刺史大順二年畧有淮
 南之地乾寧二年授淮南節度副太使知節度事封
 弘農郡王哀帝天祐三年卒子泥龔其位自稱吳王
 在位三年為大將張顥所殺別將徐溫殺顥立泥躬
 渭凡十餘年溫乃册渭為天子國號大吳渭僭號三

年而卒溫乃推行密幼子浦為主晉天福二年浦遜

位溫養子李昇

自唐大順二年至晉天福二年凡四十七年

前漢劉陟其先彭城人祖仁安仕唐為潮州長史因
 家嶺表父謙為廣州牙較以軍功拜封州刺史領賀
 水鎮使謙卒子隱復領賀水鎮兼封州刺史唐末嶺
 南節度使徐彥若薨表隱為兩使留後梁太祖為梁
 王時表陟為嶺南節度使關平初累封南海王四年
 卒陟隱之弟也代據其位梁末帝貞明二年僭號於
 廣州國號大漢後改曰龔龔讀為儼古文無此字蓋妄撰也晉高祖
 天福七年卒年五十四長子玠嗣玠在位一年陟弟

二子晟殺玠自立晟周顯德五年卒長子銀嗣皇朝
開寶三年為王師所滅始陟自梁貞明三年僭號
歷三世四主凡五十五年

後蜀孟知祥字保裔邢州龍岡人也祖察父道世為
郡較伯父方立終於邢維節度使從父遷位至澤潞

節度使知祥後唐莊宗同光三年授西川節度副大
使知節度事愍帝應順元年正月稱帝於蜀七月卒

年六十一其子昶襲偽位皇朝乾德三年為王師所
平知祥自後唐同光三年入
蜀父子相承凡四十年

後唐李昇本海州人偽吳大丞相徐溫之養子也溫
字敦美亦海州人初從淮南節度使楊行密起兵於

廬州漸至軍較唐末青州王師範為梁祖所攻乞師
於淮南楊行密發兵赴之溫時為小將亦預行其師
次青之南鄙師範已敗淮兵大掠而還昇時幼穉為
溫所虜溫愛其惠黠遂育為己子名曰知誥溫仕吳
至大丞相都督中外諸軍事諸道都統封東海王溫
卒昇為中書令累封齊王晉高祖天福二年楊浦遜
位於昇國號大齊昇自云唐玄宗第六子永王璘之
裔天寶末安祿山連陷兩京玄宗幸蜀詔璘為山南
嶺南黔中江南四道節度採訪等使璘至廣陵大募
兵甲有窺圖江右之志後為官軍所敗死於大庾嶺



北故昇指以為遠祖因還姓李氏始改名曰昇國號

大唐昇僭位七年卒長子景嗣位皇朝建隆二年卒

子熅襲偽位開寶八年為王師所平始昇以晉天福二年僭位凡三

世三十

後漢劉崇大原人漢高之從弟也乾祐初為北京留

守周太祖廣順元年崇僭號於河東稱漢改名昝世

宗顯德二年卒子承均襲偽位承均卒子繼元嗣皇

朝太平興國四年為王師所平

年號

自晉氏失馭中原之主瞻烏逐鹿亂靡有定錄是五

胡乘釁為天下倡屬而和之者十有六焉洎土運凌

遲五代喪亂跨州連郡僭竊相高咸建號紀年以備

制度前代策書悉載其事今之論次所以明其叛換

之迹為將來之戒耳

前涼張軌晉永寧元年為涼州刺史都姑臧惠帝封

西平公自軌至耀靈六世稱晉建興年號至四十二

年張祚僭即帝位始改元和平祚為張權所殺立軌

子玄靚

張玄靚自號涼州牧西平公復稱建興四十三年至

四十九年改始元升平三年為張天錫所殺



張天錫自號涼州牧西平公請命於晉在偽位十三年為符堅所滅本傳無年號

西涼李暠字玄盛唐以暠為祖故載紀稱字晉安帝隆安四年晉

昌太守唐瑤推玄盛為大都督涼公領秦涼二州牧

玄盛乃赦其境內建元為唐子義熙元年改為建初

在位十八年唐子五年建初十三年子歆嗣

李歆字士業嗣位涼公領涼州牧改元嘉興在位四

年為沮渠蒙遜所滅歆弟恂為燉煌人郡所立本傳

無年號按帝王真偽記年號永建二年

前趙劉淵字元海唐高祖淵故載紀稱其字晉惠帝永興元年僭

即漢王位於左國城南郊赦其境內年號元熙永嘉

二年僭即皇帝位於蒲改元永鳳是年遷都平陽汾

水中得玉璽文曰有新保之蓋王莽時璽也得者因

增泉海光三字元海為已瑞大赦境內改年河瑞元

海在位六年永嘉四年元海死子和嗣偽位為弟聰所殺無


年號

劉聰僭即皇帝位大赦境內改元光興二年劉曜陷

雒陽遷晉懷帝及惠帝羊后傳國六璽於平陽聰大

赦改年嘉平三年以大廟新成大赦境內改年建元

三年改元麟嘉聰在位九年永興元年聰死子粲嗣



劉粲既嗣偽位大赦境內改元漢昌在位一月為偽
大將軍錄尚書事靳準所殺準自號漢大王稱藩於

晉

劉曜元海之族子以偽相國都督中外諸軍事鎮長
安靳準既殺劉粲曜自長安赴之至於赤壁偽太尉
范隆等上尊號僭即皇帝位

晉太興元年

大赦境內唯準

一門不在赦限改元光初曜在位十年而敗

後趙石勒晉大興二年偽稱趙王依春秋列國漢初

侯王母世稱元改稱趙王元年至十一年改元太和

三年僭即皇帝位大赦境內改元建平在位十五年

太子弘嗣

石弘既嗣位改元延熙

晉咸和七年

二年石勒從子季龍

幽之逼禪於季龍石虎字季龍

唐太祖諱虎故載記稱字

以晉咸

康元年廢石弘羣臣勸稱尊號季龍下書曰朕聞道

合乾坤者稱皇德協人神者稱帝皇帝之號非所敢

聞但可稱居攝趙天王以副天人之望於是赦其境

內改年建武至十四年僭即皇帝位於南郊大赦境

內建元曰大寧明年季龍死凡在位一十五年子世

嗣

晉永和五年

石世在偽位三十三年為兄遵所殺無年

號

石遵在偽位一百八十三日為弟鑒所殺無年號

石鑒在偽位一百三日為季龍養孫冉閔所殺年號

青龍

石祗聞鑒死僭尊號於襄國為冉閔所滅無年號

冉閔殺石鑒自立改國號大魏建元曰永興復姓冉

氏明年為慕容雋所滅

前燕慕容雋晉永和五年僭即燕王位依春秋列國

故事稱元年二年雋旣尅冉閔蔣幹以傳國璽送於

建業雋欲神其事業言歷運在巳乃詐云閔妻得之

以獻賜號曰奉重君因以永和八年僭即皇帝位大

赦境內建元曰元璽其後雋太子曄死復立次子曄

為皇太子赦其境內改元曰光壽在位十一年元璽五年

光壽六年雋死子曄嗣

慕容皝晉升平四年僭即皇帝位大赦境內改元曰

建熙曄在位十一年以晉太和五年為符堅所滅

前秦符健晉永和七年僭稱天王大單于赦境內死

罪建元皇始明年健僭皇帝位于太極殿在位四年

子生嗣

符生僭皇帝位大赦境內改元壽光時晉永和十二

年也在位二年為從弟堅所殺

符堅晉升平元年僭稱大秦天王赦其境内改元曰

永興後南遊霸陵大赦改元為甘露又改元為建元

在位三十年 永興三年甘露六年 晉大元十年為姚萇

所殺

符丕堅之長庶子也堅死丕僭即皇帝位於晉陽南

立堅行廟大赦境内改元曰大安明年為慕容永所

殺 晉太元十一年

符登堅之族子丕死尚書寇遺等推立登僭即皇帝

位大赦境内改元曰太初在位九年為姚興所殺 太元十九年

十九年

符崇登之子登敗奔於湟中僭稱尊號改元延初為

乞伏乾歸所殺

後秦姚萇晉太元九年自稱大將軍大單于萬年秦

王年號白雀稱制行事十一年僭即皇帝位於長安

大赦改元建初國號大秦在位八年 白雀二年 萇死

太子興嗣

姚興僭即帝位於槐里大赦境内改元曰皇初遂如

安定其後以日月薄蝕降號稱王大赦改元弘始在

位二十二年 皇初四年弘始十八年 晉義熙十一年死子泓嗣

姚泓僭即皇帝位改元永和在位二年為晉所滅 晉義熙



丹府元壽年號
熙十三年也
卷之二十一

後蜀李特晉永安元年自稱益州牧都督梁益二州諸軍事大將軍大都督改元建初赦其境內明年特死弟流嗣

李流無年號

李雄特弟二年流死雄自稱大都督大將軍益州牧晉永興元年僭稱成都王赦其境內建元為建興丞相范長生勸雄稱尊號雄於是僭即帝位赦其境內

改元大武按帝王真偽記云晏平又改玉衡雄在位三十年建興

二年大武四年太子班嗣

李班嗣偽位為弟越所殺無年號

李期雄第四子越既殺班以期雄妻任氏所養乃讓位於期僭即帝位大赦境內改元玉恒期在位三年李壽晉咸康四年僭即偽位赦其境內改元為漢興壽在位五年子勢嗣

李勢嗣偽位赦其境內改元曰太和其後為太保李奕自晉壽舉兵反勢誅奕大赦境內改元嘉寧勢在位五年太和三年嘉寧二年為晉所滅

後涼呂光初為符堅安西將軍既入姑臧自領涼州刺史晉太元十年堅死光於是大赦境內建元曰太



安自稱凉州牧酒泉公是時麟見金澤縣百獸從之
光以為已瑞以晉孝武大元十四年僭即三河王位
置百官自丞郎已下赦其境内年號麟嘉太元二十
一年僭即天王位改元龍飛在位十年麟嘉七年龍
飛三年太安
不預因疾甚立太子紹為天王自號太上皇帝

呂紹嗣偽位數月為廢兄纂所殺無年號

呂纂晉隆安四年僭即天王位改元為咸寧在位三
年為番禾太守呂超所殺

呂隆光弟寶之子與呂超同殺纂隆既僭即位超先
於番禾得小鼎以為神瑞大赦改元為神鼎在位四

年為姚興所滅

後燕慕容垂初為符堅將晉太元八年自稱燕王建
元曰燕元十一年僭即帝位改元建興至二十一年
垂死子寶嗣

慕容寶嗣偽位改元永康在位三年為蘭汗所殺晉
隆安三年也

慕容盛寶之庶長子誅蘭汗僭即偽位改元長樂在
位三年為段璣所殺隆安五年也叔父熙嗣

慕容熙垂之少子嗣立誅段璣等赦殊死已下改年
曰光始在位六年為垂養子雲所殺

慕容雲即天王位復姓高氏大赦境内殊死已下改元正始國號大燕為幸臣離班姚仁等所殺

西秦乞伏國仁初為符堅秦川牧以晉孝武太元十年自稱大都督大將軍大單于領秦河二州牧改元

曰建義明年符登遣使署國仁苑川王在位四年弟乾歸立

乞伏乾歸自為大單于河東王赦其境内改元曰太初晉義熙三年僭稱秦王赦其境内改元曰更始在

位二十四年太初二十年更始四年子熾磐嗣
乞伏熾磐襲偽位太赦改元曰永康晉義熙六年也

晉元熙元年熾磐立其第二子慕末為太子領撫軍

大將軍都督中外諸軍事大赦境内改元曰建弘熾磐在位十五年

乞伏慕末嗣偽位三年為赫連定所殺本傳無年號

北燕馮跋初為高雲征北大將軍錄尚書事雲為其幸臣離班姚仁所殺跋帳下督張泰李桑斬班仁推跋為主晉太元二十年乃僭稱天王於昌黎赦其境

内建元曰天平在位二十三年宋元嘉七年跋死

馮弘改之弟跋死弘殺其子翼自立後為魏所伐奔高句麗在位六年偽號大興



南凉秃髮烏孤初為呂光將晉安帝隆安元年自稱大都督大將軍大單于西平王赦其境內年號太初在位三年弟利鹿孤立

秃髮利鹿孤晉隆安三年立既逾年赦其境內改元曰建和在位三年弟僣擅嗣

秃髮僣擅以晉元興元年僭號凉王遷於樂都改元弘昌又改嘉平在位十三年弘昌六年嘉平七年為乞伏熾磐

所滅

南燕慕容德垂之弟垂臨終勅其子寶以鄴城委德寶既嗣位以德為丞相冀州牧承制南夏晉隆安二

年自鄴徙於滑臺明年寶為蘭汗所殺德依燕元故事稱元年赦殊死已下置百官四年僭即皇帝位於南郊大赦改元為建平在位五年兄子超嗣位慕容超即位改元曰太上在位六年為晉所滅

北凉沮渠蒙遜等初推段業為凉州牧建康公改呂光龍飛二年為神璽元年業後僭稱凉土蒙遜殺之晉安帝隆安五年蒙遜僭稱凉州牧張掖公赦其境內改元永康義熙八年僭即河西王位大赦境內改元玄始置官寮如呂光為三河王故事在偽位三十

三年永安十二年玄始十六年承玄三年義和三年記不書承玄義和三年號按帝王真偽記編入

子茂乾嗣

沮渠茂乾在偽位七年年號承和為後魏所滅

夏赫連勃勃初為姚興安北將軍五原公晉義熙二

年僭稱天王大單于建元曰隆昇署置百官自以匈

奴氏之苗裔也國稱大夏其後改元為鳳翔勃勃既

入長安為壇於灊上僭即皇帝位赦其境內改元為

昌武自長安還統萬以宮殿大成於是赦其境內又

改元曰真興勃勃在位十八年龍昇六年鳳翔五年
昌武元年真興七年

子昌嗣

赫連昌嗣偽位年號永光四年為魏所擒弟定立

赫連定僭偽位於平涼年號服光四年為魏所滅

吳揚渭淮南節度使弘農郡王行密次子行密唐天

祐三年卒長子渥繼襲是歲梁太祖既受唐禪改元

開平而渥猶稱天祐至五年渥為大將張顥所殺顥

自稱留後將納款於梁又為別將徐溫所殺以渭為

主至十六年溫册渭為天子改元武義盡二年

楊浦溫之弟渭卒浦嗣偽位改元順義盡七年又改乾

貞盡二年又改太和盡二年又改天祚盡二年遜位於李昇

前蜀王建梁開平三年以劔東南西川節度使蜀王

僭即皇帝位於成都改元武成三年改元永平五年

改元通正是年冬改元天漢又改元光天
王衍建之幼子嗣偽位改元乾德六年十二月改明
年為咸康

漢劉陟青海靜海兩軍節度使南海王隱之弟隱以
梁開平四年卒陟代據其位貞明三年陟號於廣州
國號大漢改元乾亨九年白龍見於南海改元白龍
四年改元大有凡僭號三十六年

劉玢陟長子陟卒玢嗣偽位改元光天在位一年為
弟晟所殺

劉晟即偽位改元應乾又改元乾和

劉銀晟之長子襲偽位改元太寶

閩王延均福建節度使閩王審知次子審知卒長子
延翰嗣為延均所殺延均襲位後唐長興三年上言
吳越國王錢鏐薨乞封為吳越王不報遂自稱皇帝
國號大閩改元龍啓在位十一年

王昶延均之子嗣偽位改元通文

王延羲審知之少子嗣偽位改元永隆在位六年
後蜀孟知祥後唐應順六年以劔東南西川節度使
蜀王稱帝於蜀改元明德在位一年

孟昶知祥第三子嗣偽位猶稱明德至四年冬改明

册府元龜

年號

卷之三百一十九

年為廣政

蓋二十八
年歸皇朝

唐李昇晉天福二年以偽吳太尉錄尚事齊王受吳
禪僭即尊位國號大齊改元昇元建都於金陵尋改
國為唐在位七年

李景昇之長子嗣偽位改元保大周世宗南伐遂稱
唐國王行顯德年號

後漢劉崇周廣順元年以河東節度使僭號於大原
稱漢改名昺仍以乾祐為年號崇卒子均襲偽位

本紀

不書
年號

册府元龜

册府元龜

淮南李嗣京叅閱

西極文翔鳳訂正

豫章黃國琦較釋

僭偽部 二

形貌 聰識 令德 才藝

形貌

夫人之生也鍾五行之秀肖二儀之形所稟雖同厥
貌則異乃有偶晉室之衰地幸中原之傲擾保聚羣
黨僭竊位號雖邪謀兇德有亂於天嘗而竒姿偉狀

册府元龜 僭偽部

卷之三百一十九

一

或同於人傑斯所以資彼茲雄之氣成其悖戾之咎耳故仲尼有言曰以貌取人失之子羽是知取人之道不在乎形貌也明矣

前涼張軌字士彥有器望姿儀

前趙劉淵字元海左手文有其名猿臂善射膂力過人姿儀魁偉身長八尺四寸鬚長三尺餘當心有赤毫毛三根長三尺六寸

劉和字玄泰元海子身長雄毅美姿儀

劉聰字玄明形體非嘗在耳有一白毫毛長二尺餘甚光澤

劉曜字永明身長九尺三寸垂手過膝生而眉白目有赤光鬚髯不過百餘根而皆長五尺弱冠游於雒陽坐事當誅亡匿朝鮮遇赦而歸自以形質異衆恐不容於世乃隱迹管涔山

後趙石勒字世龍初名匄上黨武鄉羯人長而壯健父老及相者皆曰此胡狀貌奇異志度非嘗其終不可量也勸邑人厚遇之而賣與荏平人師權爲奴有一老父謂勒曰君魚龍髮際上四道已成當貴爲人主權亦奇其狀貌而免之

石虎字季龍年六七歲有善相者曰此兒貌奇有壯

冉閔字承曾身長八尺勇力絕人

前燕慕容廆字奕維瓌幼而魁岸美姿貌身長八尺雄傑有太度

慕容皝字元真龍顏版齒身長七尺八寸

慕容雋字宜英骨相不嘗身長八尺二寸姿貌魁偉

前秦苻生字長生生無一目為兒童時父洪戲之問

侍者曰吾聞瞎兒一淚信乎侍者曰然生怒引佩刀

自刺出血曰此亦一淚也洪大驚鞭之

符堅字永固臂垂過膝目有紫光祖洪愛之名曰堅

頭每曰此兒姿貌魁偉質性過人非嘗相也

後秦姚襄字景國年十七身長八尺五寸臂垂過膝

後蜀李特字玄休身長八尺雄武善騎射沈毅有大

度

李雄字仲雋身長八尺三寸美容貌少以烈氣聞每

周旋鄉里識達之士皆器重之

李勢字子仁身長七尺九寸腰帶十四圍善於俯仰

時人異之

後涼呂光字世期身長八尺四寸目重瞳子左肘有

肉印

呂隆字永基美姿貌善騎射

南燕慕容垂字道明少岐嶷有器度身長七尺七寸
手垂過膝

慕容德字玄明年未弱冠身長八尺二寸姿貌雄偉
額有日角偃月重文

慕容超字祖明身長八尺腰帶九圍精彩秀發容止
可觀

夏赫連勃勃字斛斤身長八尺五寸腰帶十圍性辨
慧笑風儀姚興見而奇之深加禮敬宋高祖入長安
遣使遺勃勃書請通和好使者還言勃勃容儀瓌偉

英武絕人高祖歎曰吾所不如也

蜀王建字光圖隆眉廣額龍睛虎視嘗於武當山遇
僧處嘗謂建曰子骨相甚貴何不從軍自求豹變而
乃區區為盜掇賊之號
閩王審知身長七尺六寸紫色方口隆準

聰識

夫鍾五行之秀為萬物之靈者其人矣乎自晉室版
蕩羣雄肇亂竊據郡國僭稱位號者比比而有雖復
乘夫否運內包逆節亦有性識穎悟器局闕遠稽古
好學摛文屬辭或留神於政治或騁辨於談議或折

節自勗或發言垂戒至於揣摩事幾必有於先見褒
貶前哲差出於衆意斯亦豪爽自負超越倫萃者哉
前涼張駿幼而奇偉晉愍帝建興四年封霸城侯十
歲能屬文卓越不羈及嗣位勤脩庶政摠御文武咸
得其用遠近嘉詠號曰積賢君

前趙劉元海嘗謂同門生朱紀范隆曰吾每觀書傳
嘗鄙隨陸無武絳灌無文道繇人弘一物之不知者
固君子之所耻也二生遇高皇而不能建封侯之業
兩公值文帝而不能開庠序之美惜哉於是遂學武
事妙絕於衆

劉曜幼而聰慧有奇度年八歲從父元海獵於西山
遇雨止樹下迅雷震樹旁人莫不顛仆曜神色自若
元海異之曰此吾家千里駒也從兄爲不亡矣
後趙石勒雅好學雖在軍旅嘗令儒生讀史書而聽
之每以其意論古帝王善惡朝賢儒士聽者莫不歸
美焉嘗使人讀漢書聞酈食其勸立六國後大驚曰
此法當失何得遂成天下至留侯諫乃曰賴有此耳
其天姿英達如此

前秦苻堅七歲聰敏好施舉止不踰規矩每侍其祖
父洪側輒量洪舉措取與不失機候高平徐統遇堅

於路異之執其手曰符郎此官之御街小兒敢戲於此不畏司隸縛邪堅曰司隸縛罪人不縛小兒戲也及卽僞位出游霸陵顧謂羣臣曰漢祖起自布衣廓平四海佐命功臣孰爲首乎權翼進曰漢書以蕭曹爲功臣之冠堅曰漢祖與項羽爭天下困於京索之間身被七十餘創通中六七父母妻子爲楚所囚平城之下七日不火食賴陳平之謀太上妻子克全免匈奴禍二相不得獨高也雖有人狗之喻豈黃中之言乎於是酣飲極歡命羣臣賦詩又時匈奴左賢王衛辰遣使降於堅遂請田內地堅許之雲朔護軍賈

雍遣其司馬徐斌率騎襲之因縱兵掠奪堅怒曰朕方脩魏絳和戎之術不可以小利忘大信昔荆吳之戰事興蠶婦澆瓜之惠梁宋息兵夫怨不在大事不在小擾邊動衆非國之利也所獲資產其悉以歸之免雍官以白衣領護軍遣使脩和示之信義辰於是入居塞內貢獻相尋又遣符維等伐代王涉翼捷其子翼圭縛父請降堅曰翼捷荒俗未叅仁義令入太學習禮以翼圭執父不孝遷之於蜀散其部落堅嘗之太學召涉翼捷問曰中國以學養性而人壽考漢北噉牛羊而人不壽何也翼捷不能荅又問鄉種人

有堪者可召爲國家用對曰漠北人能捕六畜善馳走逐水草而已何堪爲將又問好學否對曰若不好學陛下用教何爲堅善其對又聞桓溫廢海西公也謂羣臣曰溫前敗海上後敗枋頭十五年間再傾國師六十歲翁舉動如此不能思愆免退以謝百姓方廢立以自悅將如四海何諺云怒其室而作色於父者其桓溫之謂乎又梁熙遣使西域稱揚堅之威德拜以繒綵賜諸國王於是朝獻者十有餘國大宛獻天馬千里駒皆汗血朱鬣五色鳳膺麟身及諸珍異五百餘種堅曰吾思漢文之返千里馬咨嗟美詠今

所獻馬其悉返之庶克念前王髣髴古人矣乃命羣臣作止馬詩而遣之示無欲也其下以爲盛德之事遠同漢文於是獻詩者四百餘人

符登初爲長安令坐事黜爲狄道長及關中亂去縣歸毛興登兄同成言於興請以登爲司馬嘗在營部登度量不羣好爲奇畧同成嘗謂之曰汝聞不在其位不謀其政無數干時將爲博識者不許吾非疾汝恐或不喜人妄預耳是可止汝後得政自可專意時人聞同成言多以爲疾登而抑蔽之登乃屏迹不妄交游與有事則召之戲謂之曰小司馬可坐評事登

出言輒折理中與內服焉然敬憚而不能委任
前燕慕容廆嘗從容言曰獄者人命之所懸也不可
以不慎賢人君子國家之基也不可以不敬稼穡者
國之本也不可以不急酒色便佞亂德之甚也不可
以不戒乃著家令數千言以申其旨
後秦姚興既僭位晉大司馬桓玄遣使來聘請辛恭
靖何澹之與留恭靖而遣澹之謂曰桓玄不推計歷
運將圖篡逆天未忘晉必將有義舉以吾觀之終當
傾覆卿今馳往必逢其敗相見之期遲不云遠未幾
桓玄誅澹之等奔於興

後涼呂光年十歲與諸童兒遊戲邑里爲戰陣之法
倚類咸推爲主部分詳平羣童歎服
後燕慕容盛少沈敏多謀畧符堅誅慕容氏盛年十
二隨慕容永東如長子謂叔父柔曰今崎嶇於鋒刃
之間在疑忌之際愚則爲人所猜智則危甚巢幕當
如鴻鵠高飛一舉萬里不可坐待罟網也於是與柔
及弟會間行東歸於慕容垂後遼西太守李郎在郡
十年威制境內盛疑之累徵不赴以毋在龍城未敢
顯叛乃陰引魏軍將爲自安之計因表請發兵以距
寇盛曰此必詐也召其使而詰之果驗又嘗引中書

令嘗忠尚書陽璆秘書監郎敷於東堂問曰古來君子皆謂周公忠聖豈不謬哉璆曰周公居攝政之重而能達君臣之名及流言之謗致烈風以悟王道契神靈義光萬代故累葉稱其高後王無以奪其美盛曰嘗令以爲何如忠曰昔武王疾篤周公有請命之誠流言之際義感天地楚撻伯禽以訓就王德周公爲臣之忠聖達之美詩書以來未之有也盛曰異哉二君之言朕見周公之詐未見其忠聖也昔武王得九齡之夢曰文王文王曰我百爾九十吾與爾三焉及文王之終已驗武王之壽矣武王之笑未盡而求

代其死是非詐乎若惑於天命是不聖也據攝天位而丹誠不見致兄弟之間有干戈之事夫文王之化自近及遠故曰刑于寡妻至於兄弟周公親遺聖父之典而蹈嫌疑之蹤戮罰同氣以逞私忿何忠之有乎但時無直筆之史後儒承其謬談故也忠曰啓金滕而返風亦足以明其不詐遭二叔流言之變而能大義滅親終安宗國復子明辟輔成大業以致太平制禮作樂流慶無窮亦不可謂非至德也盛曰卿徒因成文而未原大理朕今相爲論之昔周公自后稷積德累仁至於文武文武以大聖應期遂有天下生

靈仰其德四海歸其仁成王雖幼統洪業而卜世脩長加呂召毛畢爲之師傅若無周公攝政王道足以成也周公無故以安危爲已任專臨朝之權闕北面之禮管蔡忠存王室以爲周公代主非人臣之道故言公將不利於孺子周公當明大順之節陳誠義以曉羣疑而乃阻兵都邑擅行誅戮不臣之罪彰於海內方貽王鴟鴞之詩歸非於主是何謂乎又周公舉事稱告二公足明周公之無罪而坐觀成王之疑此則二公之心亦有猜於周公也但以踈不聞親故寄言於管蔡可謂忠不見於當時仁不及於兄弟知羣

望之有歸天命之不在已然後返政成王以爲忠耳大風拔木之徵乃皇天祐存周道不忘文武之德是以赦周公之始愆欲成周室之大美考周公之心原周公之行乃天下之罪人何至德之謂也周公復位二公所以杜口不言其本心者以明管蔡之忠也又謂嘗忠曰伊尹周公孰賢忠曰伊尹非有周公之親而功濟一代太甲亂德放於桐宮思愆改善然後復之使主無怨言臣無流謗道存社稷美溢來今臣謂伊尹之勲有高周旦盛曰伊尹以舊臣之重顯阿衡之任太甲嗣位君道未洽不能竭忠輔導而放黜桐

宮事同夷羿何周公之可擬乎郎敷曰伊尹處人臣之位不能輔制其君恐成湯之道墜而莫就是以居之桐宮與小人從事使知稼穡之艱難然後返天位此其忠也盛曰伊尹能廢而立之何不能輔之以至於善乎若太甲性同桀紂則三載之間未應便成賢后如其性本休明義心易發當務盡規贊之理以彌成君德安有人臣幽主而據其位哉且臣之事君惟力是視柰何挾智藏仁以成君惡夫太甲之事朕已鑒之矣太甲至賢之主也以伊尹歷奉三朝績無異稱將失顯祖委授之功故匿其日月之明受伊尹之

黜所以濟其忠貞之美夫非嘗之人然後能立非嘗之事非嘗人之所見也亦猶泰伯之三讓人無德而稱焉敷曰泰伯三以天下讓至仲尼而後顯其至德太甲受謗於天下遭陛下乃申其美因而談讌賦詩賜金帛各有差

南涼禿髮僭擅利鹿孤之子初姚興遣使拜車騎將軍僭擅少機警有才畧其父竒之謂諸子曰僭擅明識幹藝非汝等輩也是以諸兄不以授子欲傳之於僭擅後為赫連勃勃所敗姚興以僭擅外有陽武之敗內有邊梁之亂遣其尚書郎常宗來觀農僭擅與

宗論六國縱橫之規三家戰爭之畧遠言天命廢興
近陳人事成敗機變無窮辭致清辯宗出而歎曰命
世大才經綸名教者不必華宗夏士撥煩理亂澄氛
濟世者亦未必八索九丘五經之外冠冕之表復自
有人車騎神機秀發信一代之偉人繇余日殫豈足
為多也

令德

六胡猾夏五馬渡江先王維桑分割有素中州舊物
吞噬無餘二趙四燕蝟毛而起三秦五涼蠶食以生
李特王蜀赫連稱夏竊帝圖王時聞令德連衡共誓

各負英獻書云萬夫之長可以觀政矧據有上宇僭
稱名器宜欲有拳拳之善以服蚩蚩之心

前涼張重華自稱涼州牧輕賦歛除關稅省園囿以
恤貧窮

張天錫數宴園池政事頗廢盪難將軍較書祭酒索
商上疏極諫天錫荅曰吾非好行行有得也觀朝榮
則敬才秀之士翫芝蘭則愛德行之臣觀松竹則思
貞操之賢臨清流則貴廉潔之行覽蔓草則賤貪穢
之吏逢颶風則惡凶狡之徒若引而申之觸類而長
之庶無遺漏矣

西凉李暠字玄盛少而好學性沈敏寬和美器度暠
既遷於酒泉沮渠蒙遜每年侵寇不止玄盛志在以
德撫其境内但與通和立盟弗之較也又與辛景辛
恭靖同志友善景等歸晉遇害江南玄盛聞而弔之
前趙劉曜嘗燕羣臣於東堂語及平生泫然流涕遂
下書曰蓋褒德惟舊聖后之所先念惠錄孤明王之
嘗典是以世祖草創河北而致封於嚴尤之孫魏武
勒兵梁宋追慟於橋公之墓前所贈大司徒烈愍公
崔岳中書令曹恂晉陽太守王忠太子洗馬劉綏等
或識朕於童亂之中或濟朕於艱窘之極言念君子

實傷我心詩不云乎中心藏之何日忘之岳漢昌之
初雖有褒贈屬否運之際禮章莫備今可贈岳使持
節侍中六司徒遼東公恂大司空南郡公綏左光祿
大夫平昌公忠鎮軍將軍安平侯並加散騎嘗侍但
皆丘墓夷滅申哀莫繇有司其速班訪岳等子孫授
以茅土稱朕意焉初曜弱冠遊於雒陽坐事當誅與
曹恂奔於劉綏綏匿之於書匱載送於王忠忠送之
朝鮮歲餘饑窘變姓名客為縣卒岳為朝鮮令見而
異之推問所繇曜叩頭自首流涕求哀岳曰卿謂崔
元嵩不如孫賓碩乎何懼之甚也今詔捕狀甚峻百

姓聞不可保也此縣幽僻勢能相濟縱有大急不過解印綬與卿俱去耳吾旣門衰無兄弟之累身又薄祐未有兒子卿猶吾子弟也勿爲過憂大丈夫處身立世烏獸投人要欲濟之而况君子乎給以衣服資供書傳曜遂從岳質通疑滯恩顧甚厚岳從容謂曜曰劉生姿宇神調命世之才也四海脫有微風搖之者英雄之魁卿其人矣曹恂雖於屯厄之中事曜有君臣之禮故皆德之

後趙石勒大興三年僞稱趙王下令曰武鄉吾之豐沛萬歲之後魂靈當歸之其復之三世又少時遇危難賴郭敬而濟後勒攻乞活李暉于上白斬之將坑其降卒見郭敬而識之曰汝郭季子乎敬叩頭曰是也勒下馬執其手泣曰今日相遇豈非天邪賜衣服車馬署敬上將軍悉免降者以配之又時大旱勒親臨廷尉錄囚徒五歲刑已下皆輕決遣之重者賜酒食聽沐浴一頃秋論還未及宮澍雨大降

石季龍時冀州入郡大蝗司隸請坐守宰季龍曰此政之失和朕之不德而欲委咎于守宰豈禹湯罪已之義邪司隸不進謹言佐朕不逮而歸咎無辜所以重吾之責可白衣領司隸

前秦苻堅既平慕容暕自鄴如枋頭讌諸父老改枋頭爲永昌縣復之終世又遣驍騎呂光率兵七萬討定西域光發長堅送於建章宮謂光曰西戎荒俗非禮義之邦羈縻之道服而赦之示以中國之威導以王化之法勿極武窮兵過深殘掠又所司奏劉蘭討隍幽州經秋冬不滅請徵下廷尉詔獄堅曰災降自天殆非人力所能除也此自朕之政違所致蘭何罪焉

後秦姚萇僭卽僞位後大雪下書深自責罰散後宮文綺珍寶以供戎事身食一味妻不重采立太學禮先賢之後敗苻登於安定東置酒高會諸將咸曰若值魏武王不令此賊至今陛下獎勞太過耳萇笑曰吾不如子兄有四身長八尺五寸臂垂過膝人望而畏之一也當十萬之衆與天下爭衡望塵而進前無橫陣二也温古知今講論道藝駕馭英雄收羅雋異三也董率大衆履險若夷上下咸允人盡死力四也所以得建立功業策任羣賢者正望筭畧中一片耳羣臣咸稱萬歲

姚興時西秦乞伏乾歸爲其下人所殺子熾盤新立羣下咸勸興取之興曰乾歸先已返善吾方當招懷

因喪代之非朕本志也興性儉約車馬無金玉之飾
臣下化之莫不敦尚清素又客星入東井所在地震
前後一百五十六公卿抗表請罪興曰災譴之來咎
在元首近代或歸罪三公甚無謂也公等其悉冠復
位後興以日月薄蝕災青屢見降號稱王下書令羣
公卿士將牧守宰各降一等於是其大尉趙公旻等
五十三人上疏諫曰伏惟陛下勲格皇天功濟四海
威靈振於殊域聲教墜於遐方雖成湯之隆殷基武
王之崇周業未足比諭方當廓靖江吳告成中岳豈
宜過垂冲損違皇天之眷命乎興曰殷湯夏禹德冠

百王然猶順守謙冲未居崇極况朕寡昧安可以處
之哉乃遣旻告於社稷宗廟大赦改元弘始賜孤老
鰥寡粟帛有差年七十已上加衣杖
姚泓字元子旣僭卽帝位將封功臣十五六人等子
男姚讚諫曰東宮文武自當有守忠之誠未有赫然
之効何受封之多乎泓口懸爵於朝所以懲勸來効
標明盛德元子遭家不造與官臣同此百憂獨享其
福得不愧於心乎讚默然姚紹進曰陛下不忘報德
封之是也古者敬其事命之以始須來春然後議之
乃止時姚懿以叛被囚姚恢復叛姚紹率輕騎先赴

難使姚洽司馬國潘將步卒三萬赴長安恢從曲牢
進屯杜成紹與恢相持於靈臺姚讚聞恢漸逼留寧
朔尹雅爲弘農太守守潼關率諸軍還長安泓謝讚
曰元子不能崇明德義導率羣下致禍起蕭牆變白
同氣旣上負祖宗亦無顏見諸父懿始搆逆滅亡恢
復擁衆內叛將若之何讚因攘袂大泣曰臣不滅此
賊終不持面復見陛下於是班賜軍士而遣之讚大
破恢并其二弟殺之泓哭之悲慟葬以公禮

後蜀李雄僭卽帝位巴都嘗告急云有東軍雄曰吾
嘗慮石勒跋扈侵逼琅邪以爲耿耿不圖乃能舉兵
使人欣然雄之雅譚多如此類雄後遣安北李雅中
領軍李珍討楊難敵難敵遣兵斷其歸道四面攻之
獲珍雅死者數千人珍雅雄兄蕩之子也雄深悼之
不食者數日則流涕深自咎責焉

西秦乞伏乾歸遣其將乞伏益州討羗乳於上邦邊
苻王松壽言於乾歸曰益州屢有戰功嘗有驕色未
宜專任乾歸卒遣之益州果敗乾歸曰孤遣蹇叔以
至於此將士何爲孤之罪也皆赦之

北燕馮跋幼而懿重少言寬仁有大度飲酒一石不
亂三弟皆任俠不修行業惟跋恭慎勤於家產父母

器之

南涼秃髮傉檀僭號涼王姚興涼州刺史王尙遣主簿宗敞來聘敞父燮呂光時自湟河太守入爲尙書郎見傉檀於廣武執其手曰君神爽宏拔逸氣凌雲命世之傑也必當剋清世難恨吾年老不及見耳以敞兄弟託君至是傉檀謂敞曰孤以嘗才謬爲尊先君所見稱每自恐有累大人冰鏡之明及忝家業竊有懷君子詩云中心藏之何日忘之不圖今日得見卿也敞曰大王仁侔魏祖存念先人雖朱暉眄張堪之孤叔向撫汝齊之子無以加也酒酣語及生平傉

檀曰卿魯子敬之儔恨不與卿共成大業耳

才藝

夫僭稱名號據有山河長百萬之氓跨數州之域生殺在手疆弱繇心或學通經史暗會孫吳或藝精騎射兼該象緯而又飾之以詞翰輔之以度量彊明政事固多才藝亦可謂人傑矣不然曷以臣伏黨類駕馭羣豪者乎

前涼張軌少明敏好學有器望

張祚博學雄武有政事之才

西涼李暠少而好學性沈敏寬和美器度通涉經史

尤善文義及長頗習武藝誦孫吳兵法

前趙劉元海幼好學師事上黨崔游習毛詩周易二

禮及尚書尤好春秋在氏傳孫吳兵法畧皆誦之史

漢諸子無不綜覽猿臂善射膂力過人

劉和好學夙習毛詩左氏春秋鄭氏易

劉聰幼而聰悟好學博士朱紀大奇之年十四究通

經史兼綜百家之言孫吳兵法靡不誦之工草隸善

屬文著述懷詩百餘篇賦頌五十餘篇十五習擊刺

猿臂善射彀弓三百斤膂力驍捷冠絕一時

劉粲少而雋傑才兼文武

劉曜幼而聰慧有奇度性拓落高亮與眾不羣讀書

志於廣覽不精思章句善於屬文工草隸雄武過人

鐵厚一寸射而洞之于時號為神射尤好兵書畧皆

闇誦弱冠遊於雒陽坐事當誅亡匿朝鮮遇赦而歸

隱迹管涔山以琴書為事

後趙石勒長而壯健有膽力雄武好騎射

石季龍尤善彈趨捷便弓馬勇冠當時

前燕慕容皝雄毅多權畧尚經學善天文

慕容雋博觀圖書有文武幹畧

慕容恪幼而謹厚深沈有大度雄毅嚴重每所言及

輒經綸世務

前秦符洪多權畧驍武善騎射

符健勇果便弓馬

符生力舉千鈞雄勇好殺手格猛獸走及奔馬擊刺
騎射冠絕一時

符堅博學多才藝有經濟大志

符丕少而聰慧好學博綜經史父堅與言將畧嘉之
命鄧羗教以兵法文武才幹亞于符融
符登少而雄勇有壯氣不修細行長而折節謹厚頗
覽書傳

後秦姚襄雄武多才藝明察善撫納士衆愛敬之

姚泓博學善談論尤好詩詠受經於博士淳于岐

後蜀李特雄武善騎射沈毅有大度

李流少好學便弓馬初東羗較尉何攀稱流有賁育
之勇舉爲東羗督

李期聰慧好學弱冠能屬文

李壽敏而好學雅量豁然少尚禮容異於李氏諸子
父雄竒其才以爲足寄重任
後凉呂纂少便弓馬好鷹犬

呂隆善騎射

後燕慕容寶自為太子砥礪自修敦崇儒學工談論
善屬文

慕容盛驍勇剛毅有伯父全之風烈

慕容雲沈深有局量厚重希言慕容寶之為太子雲
以武藝給事侍東宮

西秦乞伏國仁年十歲驍勇善騎射弯弓五百斤四
部服其雄武

乞伏乾歸雄武英傑沈雅有度量

乞伏熾磐性勇果英毅臨機能斷

北凉沮渠蒙遜博涉羣史頗曉天文雄傑有英畧滑

稽善權變

南燕慕容德博觀羣書性清慎多才藝

吳揚行密少孤貧有臂力日行三百里唐末秦宗權

擾淮石類忠盧壽郡將募能致戰擒賊者計級賞之

行密以膽力應募往必有獲

蜀王建機畧拳勇出於流輩

後蜀孟知祥自幼温厚知書樂善

